

延長縣志

人物志第九

鄉賢列女

忠烈流寓

孝義仙釋

儒行

宦績

知邑事王崇禮纂



卓節奇行不限勲階彙紀分編亦同華衮濫採失實與潛  
德失傳其戾均也邑闢在三代之初數千年人物表見諒  
可盈帙非弗深考古世遠難徵耳茲自金自今年未百紀  
而磊落英華各成其是者亦足光簡端深景仰固知人才  
不擇地豈擇時由後証前雖亦幾悲瘞玉由今証後庶幾  
免嘆遺珠至慎褚惜墨操管者自應爾爾志人物

延長縣志

卷之九



鄉賢

金

張 閏八世不異爨男女百餘口凡顯卒以家事付侄聚聚辭曰叔父行也宜主之閏曰侄宗子也宜主之讓久卒以付侄縉紳家自謂不如事閏奉 勅旌其門萬歷十一年知縣王嘉柎考祀入鄉賢祠

元

王 旻性至孝事親色養不怠父敦崇道教年八十卒旻哀毀骨立殯葬如禮廬墓三年鬼神為之感通大

延長縣志 卷之九 鄉賢

二

定閭事聞奉 勅旌其門嘉靖十三年知縣雷潔建坊萬歷十一年知縣王嘉柎考祀入鄉賢祠

明

趙 亨字達字李城里人自幼孝友著聞清操自勵應賢良方正舉歷任工部主事封父彥承德郎告養歸里一如儒素萬歷十二年知縣王嘉柎考祀入鄉賢祠

徐方貢邑生員天性孝友且能文母病侍湯藥禱以身代母喪哀泣不食葬日躬執畚鍤負築廬墓三年餘



夕門人送酒饋貢以祭母墓夜半聞鬼泣聲呼母應之方已邑令王嘉柎以孝廉薦於臺省命給冠帶貢辭曰冠紳非分所有惟願儒巾終身萬歷二十五年知縣考請王嘉柎祀名宦貢入鄉賢祠師生同日奉祀士論榮之

薛之奇字翁鉉蘇子里人事母孝數齡知定省病即嘗藥母歿泣繼以血葬登如禮鄉黨以孝稱撫七歲幼弟之鳳親授教讀為聘娶成立不分爨由拔貢銓衡州府判歷署彬州宜章常寧三州縣事以清謹題荐

延長縣志

卷之九 鄉賢

三

特加服俸一級後以採辦陵木卒於涪州囊橐蕭然累贈按察司副使康熙十九年知縣孫芳馨詳祀鄉賢祠

薛之鳳字冲鉉翁鉉弟少失怙恃依兄撫養事之如父比之奇卒於官入蜀搬櫬歸里悲泣不輟菴服外猶衣素兄之嗣以子柱斗承繼後已不再出亦不收回惟以侄名之以先人蓄積賬戶戚貧乏間與券焚之以子貴移封天津道按察司副使同凡之奇入祠祀邑紳郭境阜曰人生有擁大富享大貴而行不齒於



輿論品不重於鄉評者當時則榮歿則已焉惟秉扶  
輿正氣間世特鍾為孝子為悌弟為仁人義士為士  
林矜式宦途典型公道人心自不泯沒否則以萬古  
禮樂之宗旁叅血食匪潛則誣談何容易哉

忠烈

明

鄭集命荆門州州判訪之子也崇禎年拔貢任北直武  
邑知縣以才能顯時寇兵攻邑城高不滿丈集同士  
民守之砲敗敵敵布雲梯上城火藥盡集泣拜母曰

延長縣志

卷之九 忠烈

四

兒身已許國不能事母提刀砍登城兵數人遂自刎  
與城同沒年三十一歲時真定失守殉難者止一鄭  
令撫臣上其事部議給勅合送母妻同柩歸里因明  
運隨終未邀卹廕至今哀之

鄭國楨拔貢父仕述為山西孟縣主簿幼隨任訓詁即  
樂聞忠孝節義事後任河南歸德府通判明末宗祿  
不支督徵嚴紫自以催科無術告歸崇禎年流賊寇  
城子鳴世欲奉之逝楨曰城亡吾安所逝且豈肯屈  
膝求賊遂自刎死子鳴世見父遇難執刀出門殺賊



力盡被執賊首過天星壯其狀貌卻釋之嗚世大呼  
曰父遇爾害誓不俱生罵不絕口賊戮於馬舖原

張

程由恩貢詮南陽府經歷署鄧州知州以清操著

因父老乞養歸里值流賊破城人皆避程曰吾輩不

明順逆吾當以理諭之入城為賊所執被戮

孫芳馨曰昔梁元帝云自非識君臣之大體鑒死生

之定分何以滅七尺之軀殉一顧之感又曰從容之

用世不乏人忠貞之概時難屢有余考明季寇氛及

此地屠城之變得忠烈四人焉其一武邑令鄭君次

延長縣志

卷之九 忠烈

五

則居鄉靖節如鄭別駕父子及張參軍皆抗志不辱

與城同亡可謂殺身成仁者雖時逢革故贈卹未加

而正氣終不可磨滅爰採事實各為列傳以備激勸

之一端焉

孝義

明

焦繼蘭父早卒母李氏以節著蘭與兄繼芝侍母不離

依依孺慕母歿廬墓三年里人稱為純孝嘉靖三十

一年知縣雷潔請旌勅建全孝坊 見坊表



董 宰歲貢文行兼優父疾詣城隍廟焚香願減己壽  
延父冀割左股肉和藥以進父病得愈後沒居喪尤  
盡禮任咸陽縣訓導課士以孝友為先士林景仰之  
嘉靖二十六年知縣雷潔請旌表其門曰孝行可風  
董彥資維新遺腹子事寡母王氏以孝聞萬歷間學使  
洪公給冠帶榮之立匾旌其門

鄭 訪聞喜縣丞可薦子定省二人終身無間親歿祭  
葬盡禮不御葷酒鄉里莫不化之以拔貢任湖廣荊  
門州州判居官以清謹稱

延長縣志 卷之九 孝義

六

董養勤幼失父事母孝家貧賣餅脯為生市有鮮菜必  
先買以供母崇禎五年署知縣簡而文表其間曰孝  
行

李 蓋教授希孟子事親能備色養崇禎年寇至母沉  
病不能移蓋先負父出城至朱家灣見焦孝子墓泣  
曰母病陷於賊我生胡為遂縊死墓側鄉人哀之為  
之立墓表

國朝

蘇 芳高青里人克盡孝道出必告反必面父嗜賭勸



阻每受笞或輸錢芳即親送聞有逋欠不令父知而清給之父故奉母益篤葬祭皆竭力年七十五時思父母為脩齋鄉黨公表以明發有懷額乾隆三年建孝思維則坊以垂久云

朱大受邑庠生敦友愛不私己財其弟大成充庫書失銀大受補賠求免刑杖邑侯張公徧其門曰友同灼艾

蘇帝佐安平里庠生乾隆十五年公舉孝子雖未邀題達前邑令製匾以贈

延長縣志 卷之九 孝義

七

邑紳樊鍾秀曰孝經援神契云元氣渾沌孝在其中庶人孝則澤林茂浮珍舒怪草秀水出神魚今雖不能盡如大孝之尊親而其次弗辱其下能養故墓可廬股可割項可縊笞可受豈曰沽名亦念閭極之恩以隨分自盡耳旌門表墓誰曰不宜

王得榮安平里人仗義踈財當正統八年歲歉得榮出粟五百石以濟窮民事聞獲獎今勅建石碑存

蘇得中人和里吏員有蘭姓道失銀三十兩窘極輕命得中拾之慨與邑人贈匾曰拾金不昧



呂永清李城里吏員康熙六十年邑饑出粟濟人全活甚衆

馮玠邑廩生學優行潔娶膚施進士劉曰朝女不久逝玠不忍重配惟嗜學以自勵

劉昌祚邑庠生性潔介嚴取與妻早逝守義終身不娶道經狎邪門巷必趨而過之怪受闖逆偽職以絹紬銀兩寄祚怒擲之曰逆怪何以不義物汙我耶年九十餘讀書不倦學使王旌其門曰虞庠上壽給頂帶榮之九十八歲無疾終

延長縣志 卷之九 孝義

八

郝自行李城里人妻早卒義不再娶年九十八歲強健自如康熙年前令孫芳馨給義官頂帶以禮存問表其門聖代期頤

按以上六人俱得附於義字但劉郝二人以不再娶俱無子雖篤於夫婦而忘無後之大是亦矯情而戾於正也姑存之  
儒行

明

周 衍廣安里人家貧九歲尚牧羊不與群兒伍惟嬉



戲習禮別長幼一日隨父至縣見邑令行香乃問如何得做官父答曰讀書衍歸告父曰兒願讀書父猶豫衍不食復泣請始命就學後登永樂丁丑進士授尚書郎以才能稱出為黃州府知府儉以率屬治行著聞秩滿當遷引疾歸居鄉謙退開塾延師訓里中子弟間親為課督後進景仰之

劉 肅廣安里人自幼闔戶讀書足不履市補邑庠以經明行修辟舉於廷授刑部主事平反著績歷官有聲與權謀不協引疾歸里

延長縣志

卷之九

儒行

九

任 和年十二遊邑庠學使以花紅獎之賜馬遊郡城後登永樂丁卯鄉薦公車屢躋任刑部主事判案慈祥無枉法以父老告養歸多謙德鄉人以孝廉稱之

郭 易俊長子少習農事弟泰業儒以書授易易讀之爽然乃告父俊曰兒欲讀書負笈偕弟訪趙美從學初名昌因習易遂以易為名登永樂庚午鄉薦任四川華陽知縣川人呼郭青天以老告致歸里

郭 泰俊次子易弟母生時父夢門貼昌泰二字遂名泰幼勤學勸兄易讀書兄輟耕問字舉永樂乙卯鄉



試歷任山東東昌府知府居官廉介能斷異事著斷案三十餘篇秩滿乃曰吾父昔夢昌泰而生今已應之可歸里矣告致居鄉醇謹稱賢

趙 美姿秀才高郭氏二孝廉出其門初以文求奇異不第後聞學使言改平易獲售任福建候官知縣以寬惠著名

樊 珣辛興里人姿敏能文正統戊午登鄉薦任山西高平縣教諭課士先德行而後文藝子儀隨任授讀為乙酉榜首遂告歸恬退鄉里猶多隱德累封按察

延長縣志 卷之九 儒行

十

司僉事

蘇 章人和里人少受經於父甦讀為政篇問曰政以服官所為何事父竒之正統乙卯舉於鄉歷官湖廣永州府知府教養兼施操守廉潔屬令仰為表式以老告歸永人立碑頌德

樊 儀邑孝廉珣之子十三能文成化乙酉領解巡撫某器重之聘課其子里或構訟囑閱說儀以含忍最好退步為高成語調水仙子止之兩造感悟訟釋其厚道類此後任江西按察司僉事釐正文體崇尚實



學豫章以關西夫子稱之

蘇景泉安平里人幼習舉業以貢授山東濟南府通判在官以廉能稱甘於恬退引疾歸里訓子弟皆顯於時嘉靖間套虜入寇奉檄修建縣城泉同千戶麟占督工以石易土公私不困鄉人德之分巡道方公遠宜給匾旌獎知縣張旭陽立碑志之

鄭應奎博通經史生五子各授一經自為訓詁長曰俊次日佳季曰俾俱貴於朝餘補上舍奎以明經任山西榆次縣主簿告致歸鄉好施濟以德行稱次子佳

延長縣志 卷之九 儒行

十一

任廬州府教授李子俦請封南京錦衣衛知事俱以才學著名

王 澤家貧力學授生徒不計修脯下帷講藝足不出戶士論高之以明經授平陽王府教授年老乞休前知縣王道明表其門曰直風追古子秉仁秉忠俱以才名列膠庠

鄭可薦生平好義輕財第可陞早逝遺弟媳孀居薦撫三歲侄為督家務凡理耕獲必先幼侄而後己有書賈寄銀若干客遊他處物故其家不知也薦遠寄書



覓伊子取回後以拔貢任聞喜縣縣丞告休終老子  
訪侄謚孫配命俱以明經分任縣令州倅食其報也  
前知縣姚光裕表其門曰義方謙德

鄭 謚少事父可攀以孝聞募豎永逸橋以利行者居  
鄉謙謹動必循禮凡兇鬪者遇謚多避之明末時艱  
授徒為葉子侄七人並入泮配命集命成命尤以才  
顯俱選拔任縣令外翰人謂公循循善誘之報

鄭拱卿少有文名鄉試落第歸一青衣駝驛追至曰某  
公見召比旋往省謁之乃典試官也謂卿曰君已取

延長縣志 卷之九 儒行

三

中因三場遺失落榜甚為扼腕檢原卷資銀併漏慰  
歸後以拔貢任山東恩縣主簿有循良聲

鄭 譯素以孝友聞究心經史以歲貢授安邑訓導陞  
河南拓城知縣居官清慎歲饑捐俸粟以賑貧民全  
活甚衆至今稱之

國朝

冲 樊鳳冲生稟穎異一目十行崇禎年拔貢時闖逆僭號

羅致鄉里咸汙偽命冲逃匿荒村得免

本朝定鼎詔有司徵辟固辭不仕讀書終老享年八十餘歲



邑侯張三異題其堂曰士林傑品

董文獻思貢好義輕財有曹姓負銀無償以子立約抵還文獻姑納之代為撫娶一日喚曹姓於書舍促子媳拜之曰此汝之子媳可領回曹蹙然辭謝獻曰前為汝病姑留之此時約已焚矣何辭為人皆義之時逢鼎革未任子漢賈漢維俱以歲貢授訓導康熙八年邑侯舒暢旌其門曰鄉國模範

李養伸幼穎異寡言笑鄉人嘲號曰李板子弱冠入庠試俱優等乃心薄時藝博綜史傳旁及方書尤精醫

延長縣志 卷之九 儒行

三

常修藥餌以濟人不受值明季寇變伸倡義斷老塚為後險移治於北塞山分陴而守經畫又非迂濶者比後貢於廷辭不就著延長紀事略一編今志多採載卒年八十四歲

樊鍾秀蘇子里拔貢資學兼到博覽弘通授生徒不計脩脯著有詩稿四卷補葺縣志藏稿今修志資為藍本者居多為人雅靜不近華囂官紳俱器重之

王正邦恭順里人生姿穎異早食廩餼歲試冠軍四次課徒不計脩金善詩詞諳律例雖兩鬢垂白手不釋



卷但性好隱逸不樂仕進晚年以歲貢應詮固辭不就唯敲碁論古以娛天年而已其高致如此

張初命蘇子里人好學樂育人號張夫子以歲薦任階州訓導年滿告歸享壽八十五歲而終

郭境阜邑廩生食貧力學砥節勵行邑令李公延脩縣志未就乾隆元年詔舉孝廉方正 恩賜六品頂戴以脩詔用舌耕四十年桃李甚盛邑候趙公請赴鄉飲郭公為製懿行贊

程鵬翀乾隆元年恩貢學純品重非公不至公庭教授  
延長縣志 卷之九 儒行 十四

生徒多所成就歷任道府縣俱旌以匾

宦績

明

溫 良恭順里人篤學慷慨以明經任四川重慶推官聽訟多平反搏擊豪強奸蠹屏跡郡屬凜然為立溫公祠以祀之

宋大奎廣安里人性敏家貧日誦萬餘言而飯止一餐為率由貢生授縣丞歷知縣州至山東益運司同知以才能應薦推海防道引老歸年七十餘偕恭人朱



氏同日歿同日殯人以為有德之報

鄭之縉拔貢父早卒事繼母董盡孝道任襄陵縣丞服官謹飭猶篤於桑誼購布寄資鄉里親族貧乏者尋陞修武知縣蒞一年因明末寇起民苦引疾歸僕馬俱無一如貧素里人敬之

### 國朝

孫可望李城里人幼有大志明季歲荒盜起流落不偶至郡宿城外龍王廟夢神語曰走走望南走走可望異之遂往河南張猷忠見而竒之養為子任以帷幄猷

廷長縣志 卷之九 宦績

十五

忠歿遂領兵南踞雲南我

朝定鼎携家投誠勅封義王時本縣令舒暢陳包丁包糧之疏可望面奏

諭可截減縣綱人民復業里人建祠立坊以報之

薛柱斗之鳳子之竒嗣子初之鳳禱於岳口娘娘廟夢神贈以玉環遂生幼穎悟由拔貢初任安陽縣丞歷陞安徽巡撫政績隨處有聲又篤念桑梓庠士寄藍衫試卷戚友寄棉金脩黌宮鑄銅鼎建德配天地道貫古今二坊培鼓樓及驛城門並北山磚亭百廢具



舉歲己未

鑾輿南巡欽賜蟒袍御馬御羊等物未幾陞刑部侍郎執法  
不回貴戚斂跡以老告休囊橐蕭然子晉任江南淮  
揚道就養卒於官

樊明儒忠義里人儀表端莊家貧初事耕耨且習市貨  
為資生策見賓興舉子皆綵旗繫馬乃奮發肄業年  
二十八補弟子員延撫王及郡守欒雅重其品後以  
拔貢任浙江平湖縣丞陞縉雲知縣調雲和縣慈愛  
及民兩邑咸頌其德

延長縣志 卷之九 官績

十六

列女

明

李氏董祖妻明洪武時祖以辟薦謫戍金陵挈氏往祖  
從征卒氏詣營尋夫骸殮之負子董誥上書當事乞  
歸或勸在南改醮氏以帛束髮誓死靡他當事憐之  
放還負夫骨携幼子徒步旋里忽一日危坐呼子媳  
前曰我一生之事畢矣上帝憐我苦節已命為神爾  
子孫當世守忠義節孝言訖鼻吐白光而逝建祠於  
北山之陽即以解屍為像祀多感應蓋正氣所鍾也



屢經旌表題曰貞烈今縣董氏皆其後裔

李氏義民長女字焦子學盡婦道年二十四歲卒紡織資生撫養遺孤繼芝繼蘭成立至七十二歲無疾終子繼蘭事母以孝聞母歿廬墓三年知縣雷潔於嘉靖年請旌勅建節孝雙全坊今存

趙氏生員李鏗妻夫早卒氏守遺腹子時行紡織延師教之少年入庠咸以為節婦之報嘉靖十三年知縣雷潔申請旌表

王氏董維新妻年幼夫卒撫遺腹子承彥成立以天年

延長縣志 卷之九 列女

十七

終萬歷間事聞學憲洪公翼聖給匾曰完節可風子承彥事母孝授冠帶旌獎

李氏郭永寧妻年十九夫亡姑八十餘歲失明氏甘貧撫養孤子女瀛成立入泮萬歷三十五年知縣王崇素詳請旌表

賀氏馬陽妻年少夫亡自甘守節撫遺腹子自圖以孝行稱萬歷四十三年知縣張永烈以全節保孤表其門

賈氏生員鄭鳴世妻崇禎年賊將過天星攻城城陷鳴



世誓殺賊氏恐辱身與夫訣以鎌刀刎頸死  
董氏王育民妻夫亡氏隨孀姑劉守節撫遺孤王裔就  
學裔亦卒氏節愈堅事姑盡孝姑歿自為殯葬以壽  
終宗族鄉黨咸推孝節本縣旌其門

### 國朝

鄭氏宋雲雷妻雷亡氏誓不再嫁撫子起鳳弱冠遊庠  
嗣鳳亦早歿鳳妻竟他適遺孤結綠氏撫養延師教  
之未冠補邑庠家門昌熾皆氏存之順治二年闔邑  
士民公舉節婦知縣李如璧額其門曰堅貞二世

### 延長縣志 卷之九 列女

六

董氏生員王康妻康才品出眾早歿遺子凝命甫三歲  
氏甘苦守志織紉教之凝命入庠門戶不墜氏之力  
也順治二年知縣李如璧以額旌之

蘇氏生員鄭健妻年少夫亡克盡婦道撫孤子之昭成  
立早年入泮皓首正終一鄉稱節

朱氏生員李沂妻沂早亡遺子文英甫三月氏泣告夫  
靈守志不嫁妯娌皆勸曰三月孩提守之無益氏曰  
婦道從一而終能存此子固守之即天或不佑當與  
子偕亡從夫於地下耳明季寇荒民徙氏保孤守節



教訓成名文英弱冠遊泮人以為節婦之報順治八年知縣張三異據士民公舉匾旌其門

張氏王應秋妻秋卒氏未二十設靈尚食泣對三年或勸以再嫁氏誓死人遂莫敢言壽八十七歲茹素終身子登魁三歲喪父事母以孝聞順治十七年知縣舒暢以額旌其門

鄭氏李曰福妻福歿氏年二十五遺三歲子廷柱在襁褓時值寇燹倫嘗艱辛以保遺孤常曰氏不從夫於地下者為此孝門一息耳聞者皆感動後廷柱成立

延長縣志 卷之九 列女

先

孫五人氏苦節三十六年而終與松筠比操康熙年閩邑士民公舉知縣孫芳馨題其門節逾冰霜

王氏蘇民生妻年二十一夫亡子呈藻未週歲侄呈彩亦孤氏均撫育之閉門守志貧苦自甘雖至親罕覩其面後子侄俱成立同遊邑庠族黨莫不贊服康熙十九年士民公舉知縣孫芳馨給匾曰賢節可風  
口氏雷英之妻夫亡守幼子不再醮翁逼嫁氏刀刺一目遂終乃節

羅氏朱秉寅妻夫逝時氏年二十遺腹子應元撫育成



立八十三歲終康熙十七年 旌表

白氏郭運隆妻雍正九年 旌表

李氏何毓俊妻雍正九年 旌表

高氏劉進義妻雍正九年 旌表

董氏郭輔鼎妻年二十五歲失夫孀守壽終九十一歲

段氏郭鎮畿妻二十三歲守節壽終九十八歲

朱氏李世芳妻夫亡氏年二十三貞操矢志撫子成人

閩邑公議以節孝流芳匾其門

彭氏李玉堂妻夫亡時氏年二十七遺子四歲松筠自

延長縣志 卷之九 列女 二十

誓撫以成立壽八十三歲終邑人咸稱為栢舟節操

段氏廩生鄭恪妻夫早逝氏年二十一生子甫七月家

貧冰雪矢志撫子陳頌成人居孀四十餘載洵稱完

節

朱氏李長貢妻夫早亡氏二十六歲居孀遺子六齡氏

苦志勵節堅冰自撫子成人至今壽六十歲

田氏廩生鄭諄妻生一子天命食餼早逝遺妻未逾年

亦亡子崑珠甫三歲田氏曰鄭氏一脉全在此子如

天不絕鄭氏使氏多壽幾年得撫此子成人鄭門之



幸也辛苦撫養崑珠早入庠食餼邑侯晏公遍其門  
曰儒林祥鳳邑人皆推賢氏之力

白氏常廣金妻金亡子經入庠亦逝遺孫主鼎甫五歲  
氏撫之稍長氏忍饑紡績俾鼎讀書後鼎游泮食餼  
列明經氏年七十五臨終猶以立身貴端方勿負吾  
桔据勿墜爾家聲為勗人皆推母教有成云

朱氏康晟之妻居孀撫子未幾子亦亡遺弱孫二人氏  
撫養成立壽終八十七歲閩邑士庶遍其門曰克終  
姆教

延長縣志 卷之九 列女

三

康氏鄭國文妻二十九歲居孀撫四子成立終年八十  
歲

張氏王嘉祥妻二十三歲夫殞子未週歲氏誓守撫育  
成立苦節四十九年終雍正年公舉節婦懸額

鄭氏羅光奎妻通判鄭國楨女夫歿年二十八苦節五  
十四年教孫成立年八十二時欽奉

恩詔公舉題請府旌以一代女宗縣表以節堅壽永壽終八  
十八歲

張氏張士清之妻二十八歲居孀現年九十歲倍覺康



健

董氏蘇樓鴻妻夫亡年口十口始終全節乾隆口年旌表

史氏生員王誠妻年二十九孀守事二老以媳代子撫幼子以母代父今五十有九歲人稱節而有能

高氏李瑞妻年二十三歲夫逝遺子三良僅滿月栢舟矢志撫子長大入庠今壽七十三歲邑人咸以貞操稱

馮氏宋璉妻侄明鏡五歲失怙恃叔父璉亦隨沒氏代  
延長縣志 卷之九 列女 三

錄

夫撫侄加厚懿訓尤切紡績以資膏火終即飲泣責之侄力學入庠食饑氏時貧且病猶典產資侄鄉試臨終時勗侄勿廢書嗣明鏡膺選拔前令郭為製賢節歐陽贈訓成猶子之匾

王氏庠生李誓生妻年二十一夫亡遺二子俱幼並無伯叔兄弟氏專以織紡針指延生孝事孀母撫二子成立現年六十二歲前令歐陽表其門曰霜清柏茂馮氏董閑妻年二十口守節茹蘗飲水人稱先行雍正

九年 題請建坊



高氏賀文倉妻年二十五歲夫歿子甫四歲矢志守節  
撫孤備歷困苦壽八十歲終

侯氏劉學義妻年二十五孀守孝養舅姑撫子邦清成  
立邑人以竹筠冰操表其門

白氏劉學仁妻夫亡氏三十歲子邦安五歲撫子守節  
孝養舅姑邑人以匪石之貞表其門又額以一門雙  
節

趙氏段學義妻夫亡氏年二十七子週歲家貧苦氏上  
侍舅姑下撫孤雛躬負薪水水操愈堅現五十四歲

延長縣志 卷之九 列女

三

沙氏貢生王大臣妻雍正十二年

旌表

董氏馮士萃妻茹苦撫子成立雍正十二年

旌表

羅氏王治妻治早喪無子氏念舅年老無人奉養撫堂

弟王泓幼子承繼躬親紡織奉翁紹舜舜得頤養壽

幾百齡又撫嗣子成立邑人公贈以節孝可風

蘇氏呂得祺妻祺亡氏年二十九子未週歲苦志守節

紡織度日備歷艱辛撫孤成立現年六十五歲

流寓

唐



國朝

李 賀字長吉隴西人鄭王孫官協律郎舊稿列流寓  
並載奉和二兄罷使遣馬歸延州一作余謂此詩不  
必在延長所作姑仍之

王德修江南人曾至縣訪前邑令孫芳馨有題口 見

藝文

葉映榴江南人有題詠載後按映榴任陝西學道不在  
流寓之列但延長僻處山城映榴至縣訪前令孫芳  
馨時馨宮鼎新映榴拜謁作記他多賡和故附而不

延長縣志 卷之九 流寓

三

刪

沈必璉浙江山陰人寓此有石油一作見藝文

劉允煥新城人寓此有酒井一作見藝文

惠世揚清澗人官刑部侍郎過此有題詠見藝文

白壽宸清澗舉人寓此有題詠見藝文

按勝地名區多傳高人舊蹟或徵諸事業或採諸藝  
文大都借其人為此地光寵否則鹿鹿萍踪何日茂  
有率過而不留耳延長僻在郡東山叢徑險憶古來  
名公蒞此者少即茲採登諸人猶多附註此外何虞



遺漏吉光片羽似寥寥不足記矣然別類分門終當  
勿缺鑿者諒之

仙釋

元

趙磨哥元至正間人事母孝敬其長兄自幼形狀若顛  
而語多清爽人皆異之曾牧羊曲肱卧於山麓以手  
畫地則羊莫敢出一日歸晚母詰其故曰兄遠去心  
甚戀依適往西安探之故來遲耳母未之信乃取麥  
穗數莖及餅肉之類奉母曰西安地暖故早有此物

延長縣志

卷之九 仙釋

三

明

兄所寄也人益傳為奇奉母終不願婚娶雲遊莫知  
所之後歸府城東關太乙宮為道士白日上昇本村  
立廟祀之稱曰趙仙

真性俗姓張萬歷年太平寺住持古貌慈心幼証道魔  
歷試不動遍遊五臺普陀諸山造水陸像七十餘軸  
裝香佛以供十方奉諸藏經皆備今寺內諸營造多  
其手跡

國朝



海璉字器之俗姓李幼習舉子業能文章明末闖逆抽壯丁編伍惡少俱應募璉以家世儒素明逆順恐不免遂披緇於太平寺究心內典尤曉詩律士大夫樂與之遊號玉峰和尚年七十餘著道旁草詩偈語錄諸集

郭道人名節幼時夢騎白馬上天伯兄以幻叱之後因父母妻相繼沒拔刀刎斷喉系縫合氣不伸制銀筒以通息語瘖瘂難解雲遊鄜州得修真術歸里居青雲山柏葉延生冬夏不冠履虎豹不噬曾見美婦語

延長縣志

卷之九

仙釋

三

曰汝功圓滿毋久住此蕪辟穀恐損法身節提批揮之婦以簪畫地成溪渡去節不遂問曰可是觀音菩薩否遂不見社人為造衲衣辭不受遺語一紙了無取義及火化無一不應者時年四十二歲伯兄郊砌塔以葬之

邑紳樊鍾秀曰道德五千言妙相三十種為佛老法教之祖緇黃者果能相承衣鉢不墜宗風亦不可斥以異端任其姓名湮沒茲若趙真人送母終而紫服脩真海璉僧因闖逆而空門披剃兩人尤可謂二氏



中之能識大義者也

延長縣志

卷之九 仙釋

二十七